



МОНГОЛ УЛСЫН ИХ СУРГУУЛИЙН
ЗАХИРЛЫН ТУШААЛ

2018 оны 12 сарын 28 өдөр

Дугаар A/499

Улаанбаатар хот

Г
Монгол Улсын Их Сургуульд гадаадын
иргэнийг суралцуулах журам батлах тухай

Монгол Улсын “Дээд боловсролын тухай” хуулийн 12.1.4 дэх заалт, МУИС-ийн Дүрмийн 4.3.8.4 дэх заалт, МУИС-ийн Захиргааны зөвлөлийн хурлын 2018 оны 12 дугаар сарын 18-ны өдрийн хуралдааны шийдвэрийг тус тус үндэслэн ТУШААХ нь:

1. “Монгол Улсын Их Сургуульд гадаадын иргэнийг суралцуулах журам”-д нэмэлт өөрчлөлт оруулж, 2019 оны 01 дүгээр сарын 01-ний өдрөөс эхлэн мөрдсүгэй.

2. “Монгол Улсын Их Сургуульд гадаадын иргэнийг суралцуулах журам”-ыг 1 дүгээр хавсралтаар, “Оюутан солилцоо хөтөлбөрт хамрагдах суралцагчтай байгуулах 3 талт гэрээ”-г 2 дугаар хавсралтаар тус тус баталсугай.

3. Монгол Улсын Их Сургуульд гадаадын иргэнийг суралцуулах журам шинэчлэн батлагдсантай холбогдуулан МУИС-ийн Захирлын 2014 оны 06 дугаар сарын 23-ны өдрийн А/214 тоот тушаалаар батлагдсан “Монгол Улсын Их Сургуульд гадаадын иргэнийг суралцуулах журам”, МУИС-ийн Захирлын 2009 оны 11 дүгээр сарын 16-ны өдрийн 727 тоот тушаалаар батлагдсан “МУИС-ийн гадаад оюутны байрны журам”, МУИС-ийн дэд захирлын 2013 оны 03 дугаар сарын 05-ны өдөр батлагдсан “МУИС-ийн Зуны сургалтыг зохион байгуулах журам”-ыг тус тус хүчингүй болсонд тооцсугай.

4. Тушаалын хэрэгжилтэнд хяналт тавьж ажиллахыг Сургалт, оюутан хариуцсан дэд захирал (Б.Очирхуяг), бүрэлдэхүүн/салбар сургуулийн захирлууд, нэгжийн удирдлагуудад үүрэг болгосугай.

ЗАХИРЛЫН ҮҮРЭГ
ГҮЙЦЭТГЭГЧ



Я.ТӨМӨРБААТАР



МОНГОЛ УЛСЫН ИХ СУРГУУЛЬД ГАДААДЫН ИРГЭНИЙГ СУРАЛЦУУЛАХ ЖУРАМ

НЭГ. НИЙТЛЭГ ҮНДЭСЛЭЛ

1.1 Хоёр улсын Засгийн газар хоорондын гэрээ хэлэлцээр, хамтын ажиллагааны гэрээний дагуу болон хувийн шугамаар суралцах гадаадын иргэнийг Монгол Улсын Их Сургууль (цаашид МУИС гэх)-д суралцуулах үйл ажиллагааг зохицуулахад энэ журмын зорилго оршино.

1.2 Монгол улсын Боловсролын тухай хууль, Дээд боловсролын тухай хууль, боловсролын асуудал эрхэлсэн төрийн захиргааны төв байгууллага болон МУИС-ийн холбогдох журмыг үндэслэн МУИС-ийн боловсролын зэрэг олгох болон зэргийн бус сургалтанд гадаадын иргэнийг суралцуулахад энэхүү журмыг баримтална.

1.3 Энэ журмаар зохицуулагдахгүй асуудал гарвал МУИС-ийн захиргааны зөвлөл хэлэлцэж, захирал шийдвэр гаргана.

ХОЁР. ЖУРМЫН НЭР ТОМЬЁО

2.1. Боловсролын зэрэг олгох сургалт нь МУИС-ийн бакалавр, магистр, докторын зэрэг олгох сургалтыг хэлнэ.

2.2. Зэргийн бус сургалтанд Монгол хэлний бэлтгэл, оюутан солилцоо, мэргэших дадлага (интерншип), зуны сургалтын хөтөлбөрүүдийг хамруулж ойлгоно.

2.3. Монгол хэлний бэлтгэл хөтөлбөр гэдэг нь Монгол улсын дээд боловсролын байгууллагад суралцах хүсэлтэй болон монгол хэл суралцах сонирхолтой, тус улсад оршин суугаа гадаадын иргэдэд зориулсан түр хугацааны зэргийн бус сургалтыг хэлнэ.

2.4. Оюутан солилцооны хөтөлбөр гэдэг нь МУИС-тай хамтын ажиллагааны гэрээтэй гадаадын их, дээд сургуулиас боловсролын зэрэг олгох сургалт, Монгол хэлний бэлтгэл хөтөлбөрт суралцагч ирж суралцах, нөгөө талаас МУИС-ийн суралцагчдаас уг гэрээт сургуулийн сургалтын хөтөлбөрт хамрагдаж суралцах хөтөлбөрийг хэлнэ.

2.5. Зуны сургалтын хөтөлбөр нь монгол хэл, соёл, орчинтой танилцах, тодорхой чиглэлээр судалгаа хийх хүсэлтэй гадаадын иргэдэд зориулсан богино хугацааны сургалтын хөтөлбөр юм.

2.6. Мэргэжих дадлага (интерншип) гэж хамтын ажиллагааны гэрээтэй гадаадын их, дээд сургуулиас болон профессор багшийн хамтарсан судалгааны хүрээнд суралцагч ирж, тодорхой мэргэжил, судалгааны чиглэлээр дадлагаших хөтөлбөрийг хэлнэ.

2.7. Цагаач гэж Монгол улсын эрх бүхий байгууллагаас цагаачлан оршин суух зөвшөөрөл авсан гадаадын иргэн, харьяалалгүй хүнийг хэлнэ.

УХД0072 9104399

ГУРАВ. ГАДААДЫН ИРГЭНД ТАВИДАХ ШААРДЛАГА

3.1. Монгол улсын харьят бус гадаадын иргэн хаана оршин суугаагаас үл хамааран энэ журмын хүрээнд МУИС-д суралцах хүсэлт гаргаж болно.

3.2. МУИС-ийн боловсролын зэрэг олгох сургалтанд суралцах гадаадын иргэн нь Монгол улсад мөрдөгдөж буй боловсролын агуулгын түвшин, стандарттай дүйцэхүйц өмнөх шатны боловсрол эзэмшсэн байна.

3.3. Гадаадын иргэн нь боловсролын зэрэг олгох сургалтанд суралцах бол монгол хэлийг шаардлага хангасан түвшинд эзэмшсэн байх ёстой ба үүнийг нотлох диплом, гэрчилгээний баталгаажуулсан хуулбарыг элсэх хүсэлт гаргах үед ирүүлнэ. Монгол хэлийг тодорхой түвшинд эзэмшсэн боловч түүнийг нотлох бичиг баримт байхгүй бол Монгол хэлний түвшин тогтоо шалгалт (цаашид МХТТШ гэх) өгч болох ба үнэлгээний тодорхой түвшнийг хангасан тохиолдолд зэрэг олгох сургалтанд элсэн суралцана. МХТТШ-ыг цахим хэлбэрээр зохион байгуулж болно.

3.4. Монгол хэлний зохих шаардлага хангагүй гадаадын иргэн Монгол хэлний бэлтгэл хөтөлбөрт хамрагдан, амжилттай төгссөний дараа боловсролын зэрэг олгох сургалтанд элсэн суралцаж болно.

3.5. Англи хэлээр сургалт нь явагддаг, боловсролын зэрэг олгох сургалтын хувьд гадаадын иргэнээс монгол хэлний мэдлэг, чадвартай байхыг шаардахгүй боловч, тухайн хөтөлбөрийн шаардлагад нийцсэн англи хэлний түвшинтэй байхыг шаардана. Энэ тохиолдолд англи хэлний мэдлэг, чадварын түвшинг илтгэх бичиг баримтыг (TOEFL, IELTS гэх мэт шалгалтын оноо нь хүчинтэй гэрчилгээ) элсэх хүсэлт гаргах үед хавсаргаж ирүүлнэ.

3.6. Хөтөлбөрийн онцлогоос шалгаалан бүрэлдэхүүн сургууль, мэргэжлийн тэнхимээс бусад тусгай шаардлагыг элсэгчдэд тавьж болно.

ДӨРӨВ. ЭЛСЭН СУРАЛЦАХ ХҮСЭЛТ ГАРГАХ

4.1. Боловсролын зэрэг олгох сургалтанд хамрагдан суралцах хүсэлтэй гадаадын иргэн нь МУИС-ийн <http://registration.num.edu.mn> хаягаар цахим хэлбэрээр хүсэлт гаргаж бүртгүүлнэ.

4.2. Элсэлтийн үйл ажиллагааг бакалаврын зэрэг олгох сургалтын хувьд хичээлийн жилд нэг удаа, ахисан түвшний сургалтын хувьд хоёр удаа зохион байгуулна.

4.3. Боловсролын зэрэг олгох сургалтын хөтөлбөрийн танилцуулга, элсэлтийн үйл ажиллагаанд холбогдох бусад мэдээллийг МУИС-ийн веб хуудсанд монгол, англи хэлээр байршуулна. Элсэлтийн цахим хуудас нь бүтэн жилийн турш тогтмол ажиллагаатай байж элсэлтийн талаарх мэдээллээр бүртгүүлэгчдийг хангана.

4.4. Элсэн суралцах тухай хүсэлтийг дараах хугацаанд багтаан ирүүлсэн байна.

Үүнд:

4.4.1. Бакалаврын зэрэг олгох хөтөлбөрт элсэх тухай хүсэлтийг 5 дугаар сарын 01-нээс 7 дугаар сарын 20-ны хооронд гаргаж бүртгүүлнэ.

4.4.2. Магистр, докторын зэрэг олгох хөтөлбөрт элсэх хүсэлтийг намрын улиралд суралцах бол 5 дугаар сарын 01-нээс 8 дугаар сарын 20-ны хооронд, хаврын улиралд суралцах бол 10 дугаар сарын 01-нээс 12 дугаар сарын 20-ны хооронд тус тус гаргаж бүртгүүлнэ.

4.5. Гадаадын иргэн адил түвшний хэдэн ч хөтөлбөрт хүсэлт гаргаж болох бөгөөд цахимаар бүртгэлийн хураамж төлснөөр хүсэлт баталгаажна.

4.6. Элсэн суралцах хүсэлт гаргаж буй гадаадын иргэн дээр дурьдсан хугацаанд багтаан дараах бичиг баримтуудыг бүрдүүлэн цахимаар бүртгүүлнэ. Үүнд:

4.6.1. Элсэх хүсэлт гаргах маягт (загварын дагуу);

4.6.2. Өмнө нь эзэмшсэн боловсролын түвшинг илтгэх диплом, дүнгийн хавсралтын хамт (монгол эсвэл англи хэлнээс өөр хэлээр бичигдсэн бол эдгээр хэлний аль нэг рүү нь орчуулсан байх);

4.6.3. Гадаад паспорт (хүчинтэй хугацаа 6 сараас дээш байх);

4.6.4. Монгол улсад суралцах хугацааны сургалтын төлбөр, амьдрах зардлыг хариуцах байгууллага, хувь хүнээс гаргасан санхүүгийн баталгаа (тэтгэлэг, банкны тодорхойлолт болон түүнтэй дүйцэх баталгаа);

4.6.5. Тухайн иргэний мэдлэг боловсрол, ажлын туршлага, суралцах арга барилыг нь тодорхойлсон удирдах ажилтны болон профессор багшийн тодорхойлолт (загварын дагуу);

4.6.6. Монгол эсвэл англи хэлний мэдлэг, чадварын түвшинг тодорхойлох гэрчилгээ, сертификат;

4.6.7. Эрүүл мэндийн хуудас (загварын дагуу, сүүлийн 3 сарын дотор эмнэлгээс олгосон байх);

4.6.8. Цээж зураг (сүүлийн 6 сард авхуулсан, 3x4 хэмжээтэй байх).

4.7. Монгол хэлний бэлтгэл хөтөлбөрт суралцаж буй гадаадын иргэний хувьд сургалт дуусахаас 7 хоногийн өмнө боловсролын зэргийн сургалтанд элсэх хүсэлт гаргаж бүртгүүлнэ.

4.8. Бичиг баримт дутуу, өөр агуулгатай бичиг баримт бүрдүүлэх, холбоо барих хаяг тодорхойгүй байх тохиолдолд элсэх бүртгэлээс хасагдана.

4.9. Дээр дурдсан хугацаанаас хэтрүүлэн гаргасан хүсэлтийг хүлээн авахгүй.

ТАВ. ЭЛСЭХ ХҮСЭЛТИЙГ ШИЙДВЭРЛЭХ, МЭДЭГДЭХ

5.1. Элсэлт бүртгэлийн хэлтэс нь (цаашид ЭБХ гэх) суралцах хүсэлт гаргасан гадаадын иргэний бичиг баримтыг хүсэлт гаргах хугацаа дууссанаас хойш долоо хоногийн дотор хянаж, холбогдох хөтөлбөр хариуцсан тэнхимд хүргүүлэх ба элсэлтийн шалгалтыг тэнхимтэй хамтран цахим хэлбэрээр зохион байгуулж

шийдвэрлүүлнэ. Суралцуулах эсэх тухай шийдвэрийг Оюутан, төгсөөгчийн хэлтэст (цаашид ОТХ гэх) ирүүлнэ.

5.2. Монгол хэлний бэлтгэл хөтөлбөрт амжилттай суралцан, боловсролын зэрэг олгох хөтөлбөрт элсэх хүсэлт гаргасан гадаадын иргэний элсэлтийн шалгалтыг хөтөлбөрийн сургалт дууссаны дараах долоо хоногт багтаан ЭБХ нь холбогдох тэнхимтэй хамтран зохион байгуулж шийдвэрлүүлнэ.

1117144746
УХД0072 9104399

5.3. Элсэлтийн шийдвэрийг үндэслэн ОТХ нь гадаадын иргэдийн холбогдох бичиг баримтыг нягтлан, шаардлага хангасан гадаадын иргэнд суралцах зөвшөөрөл, виз мэдүүлэхийг зөвшөөрсөн албан бичиг олгогдсон гадаадын иргэнд МУИС-д суралцах эрхийн бичгийг цахим шуудан болон баталгаат шуудангаар илгээнэ. Захидалд Монгол улсад суралцах виз хэрхэн авах тухай зөвлөмж, сургалтын төлбөр, хураамж, дотуур байр, амьдрах орчны талаарх мэдээлэл, сургуульд ирж бүртгэл баталгаажуулах хугацаа зэргийг заавал дурдсан байна.

5.4. МУИС-д суралцах эрх нь хичээлийн жилийн дараалсан хоёр улиралд хүчинтэй.

5.5. МУИС-д суралцах эрх авсан гадаадын иргэн ОТХ-ээс Монгол улсад суралцах визний холбогдолтой асуудлаар зөвлөгөө авч болно.

5.6. Хоёр улсын Засгийн газар хоорондын болон хамтын ажиллагааны гэрээ, хэлэлцээрийн дагуу суралцах гадаадын иргэдийг БСШУСЯ-ны сайдын тушаалыг үндэслэн МУИС-ийн Захирлын тушаалаар шууд элсүүлэн суралцуулна.

5.7. Элсэлттэй холбоотой бичиг баримтыг хуурамчаар үйлдсэн тохиолдолд МУИС-д элсүүлэхгүй бөгөөд элссэн тохиолдолд суралцах эрхийг цуцална.

ЗУРГАА.СУРАЛЦАГЧИЙГ ХҮЛЭЭН АВАХ, БҮРТГЭХ, БАЙРЛУУЛАХ

6.1. МУИС-д суралцах эрх авсан гадаадын иргэн тухайн улирлын хичээл эхлэхээс 7-14 хоногийн өмнө ЭБХ-т биеэр ирж бүртгэлээ баталгаажуулан, МУИС-ийн сургалтын мэдээллийн систем ашиглах хэрэглэгчийн нэр, нууц үгийг авч, гэрээ байгуулна.

6.2. Гэрээнд гадаадын иргэний суралцах хугацаа, тэтгэлэг, сургалтын болон бусад төлбөрийн хэмжээ, амьдрах байр, суралцах орчин, нөхцөл, эрүүл мэнд, даатгалын асуудал, хүлээх хариуцлага болон шаардлагатай бусад асуудлыг тусгасан байна.

6.3. Гэрээ байгуулсан гадаадын иргэнийг МУИС-ийн захирлын тушаалаар элсүүлэн, БСШУСЯ-ны системд бүртгэнэ.

6.4. Бүртгүүлсэн суралцагчид тухайн улиралд суралцах багц цагийн төлбөрөө төлж, хичээл сонголт хийснээр сургалтын үйлчилгээг авах эрх нээгдэнэ.

6.5. Хичээлийн жил эхлэхээс өмнөх долоо хоногт багтаан гадаад суралцагчийг чиглүүлэх, сургалттай холбоотой үйлчилгээ, хичээл сонголтын зөвлөгөө өгөх ажлыг ЭБХ зохион байгуулна.

6.6. МУИС-д суралцах эрх авсан гадаадын иргэн МУИС-ийн оюутны дотуур байранд амьдрах болон угтах үйлчилгээ авах талаар ОТХ-т урьдчилан мэдэгдсэн байна.

6.7. Хүсэлтийн дагуу гадаад суралцагчдыг угтах, тосох, оюутны дотуур байранд байрлуулах, дотуур байранд амьдрах гэрээ байгуулах асуудлыг ОТХ хариуцан зохион байгуулна.

6.8. Оюутны дотуур байранд хүсэлт гаргасан гадаад суралцагчийг байрлуулахад дараах эрэмбийг баримтална. Үүнд:

6.8.1. Засгийн газар хоорондын болон хамтын ажиллагааны гэрээ, хэлэлцээрийн дагуу суралцах гадаад суралцагчид;

6.8.2. Шинээр элсэн суралцах гадаад суралцагчид;

6.8.3. Бусад.

6.9. Гадаадын суралцагчийг Монгол улсад орж ирсэн өдрөөс хойш ажлын 7 хоногийн дотор Гадаадын иргэн харьяатын газарт (цаашид ГИХГ гэх) шаардагдах бичиг баримтыг бүрдүүлэн бүртгүүлж, тус улсад орж ирсэн өдрөөс хойш хуанлийн 21 хоногийн дотор оршин суух зөвшөөрөл авах ажлыг ОТХ зохион байгуулж, гадаад суралцагчийн суралцах нөхцөлийг бүрдүүлнэ.

6.10. МУИС-д суралцах эрх авсан гадаадын иргэн хүндэтгэн үзэх шалтгаанаар хичээлийн жилийн тухайн улирлын эхний хоёр долоо хоногт багтаж суралцахаар ирвэл элссэн тухай тушаал гарган, тухайн улирлын хичээлийг судлах эрх өгөх ба дурдсан хугацаанаас хойш ирвэл дараагийн улирлын эхнээс хичээл судлах эрх олгоно.

ДОЛОО. СУРАЛЦАХ ҮЙЛ АЖИЛЛАГААГ ЗОХИЦУУЛАХ

7.1. МУИС-ийн суралцагч болсон гадаад иргэн Монгол улсын харьяат суралцагчдын нэгэн адил дүрэм, журмаар суралцана.

7.2. Гадаад иргэний оршин суух зөвшөөрлийн хугацааг суралцаж буй бүрэлдэхүүн сургууль, нэгжийн тодорхойлолт, сурлагын байдал, гэрээний биелэлт зэргийг үндэслэн жил бүр сунгах асуудлыг ОТХ хариуцан зохион байгуулна. Гадаад суралцагч нь оршин суух зөвшөөрлийн хугацаа дуусахаас 30 хоногийн өмнө өөрийн биеэр ОТХ-т хандан шаардлагатай материалыг бүрдүүлэн зөвшөөрлийн хугацааг сунгуулна. Хуульд заасан хугацаанд сунгуулаагүй тохиолдолд холбогдох хариуцлагыг суралцагч өөрөө хариуцна.

7.3. Гадаад суралцагч нь өвөл, зуны улирлын амралтаар болон хүндэтгэн үзэх шалтгаанаар чөлөө авч нутаг буцах тохиолдолд холбогдох нэгж, тэнхимд мэдэгдэн, ОТХ-ээр дамжуулан ГИХГ-аас гарах, орох визний зөвшөөрөл авна.

7.4. Монголын бусад их сургуулиас МУИС-д болон МУИС-ийн хөтөлбөр хооронд шилжин суралцах хүсэлтэй гадаад суралцагчийн хүсэлтийг “МУИС-д суралцагч шилжүүлэн суралцуулах журам”-ын дагуу шийдвэрлэнэ.

7.5. Зэргийн бус сургалтанд хамрагдаж буй гадаад иргэдийг өөр сургуульд шилжүүлэн суралцуулахгүй.

7.6. Сургууль төгсөх, хасагдах, шилжих, чөлөө авах зэрэг шалгаанаар сургалтаа зогсоосон гадаадын иргэний талаарх шийдвэр гарч, суралцагчийн төлөв өөрчлөгдсөн мэдээллийг ОТХ нь 7 хоногийн дотор боловсролын асуудал эрхэлсэн төрийн захиргааны төв байгууллага болон холбогдох нэгжид хүргүүлнэ.

7.7. Гадаадын иргэний МУИС-д элсэн суралцах хүсэлт шийдвэрлэгдсэнээс хойши Монгол улсад ирэх, түр бүртгэлд хамруулах, оршин суухтай холбоотой асуудлууд, зөвлөн чиглүүлэх, дасан зохицох, гэнэтийн ~~хүслэгчийн~~ болон эрүүл мэндийн даатгалд хамруулах, суралцах хугацааны дэмжлэг үйлчилгээ, нийгэм, соёлын хөтөлбөрт хамруулах асуудлыг ОТХ хариуцна.

НАЙМ. СУРГАЛТАЙ ХОЛБООТОЙ ТӨЛБӨР, ХУРААМЖ

8.1. Гадаад суралцагчийн судлах хичээлийн багц цагийн төлбөр, оюутны байрны төлбөр, бусад төлбөр, хураамжийг жил бүр шинэчлэн тогтоож МУИС-ийн Удирдах зөвлөл батална. Сургалтын төлбөрийг суралцагч улирал бүр төлнэ.

8.2. Хоёр улсын Засгийн газар хоорондын болон хамтын ажиллагааны гэрээ, хэлэлцээрийн дагуу суралцах гадаадын иргэдийн сургалтын төлбөр болон амьдрах зардал, даатгал бусад зардлыг гэрээнд заасны дагуу шийдвэрлэнэ.

8.3. МУИС-д суралцаж буй гадаадын иргэн суралцах явцдаа иргэний харьяаллаа сольж, Монгол улсын харьят иргэн болсон бол албан ёсоор Монгол улсын иргэн болсон өдрөөс сургалтын мэдээллийн систем дэх иргэншлийн төлөвийг өөрчилнэ. Сургалтын төлбөрийг дараагийн улирлаас эхлэн Монгол суралцагчийн жишгээр тооцно.

8.4. МУИС-д суралцах эрх авсан гадаадын иргэн амь насны, эрүүл мэндийн болон гэнэтийн ослын даатгалыг эх орондоо эсвэл Монгол улсад ирсэн хойно заавал хийнэ.

8.5. Цагаач нь Монгол улсад бүрэн дунд боловсрол эзэмшсэн, Элсэлтийн ерөнхий шалгалт өгч, харгалзах оноогоор элсэн суралцсан бол сургалтын төлбөрийг Монгол улсын харьят суралцагчдын адилаар төлнэ.

ЕС. МОНГОЛ ХЭЛНИЙ БЭЛТГЭЛ ХӨТӨЛБӨР

9.1. Монгол улсын дээд боловсролын байгууллагад суралцах хүсэлтэй болон монгол хэл суралцах сонирхолтой, тус улсад оршин суугаа гадаадын иргэн Монгол хэлний бэлтгэл хөтөлбөрт суралцаж болно.

9.2. Монгол хэлний бэлтгэл хөтөлбөр анхан, дунд, гүнзгий түвшинтэй байх бөгөөд түвшин бүрийн үргэлжлэх хугацаа хичээлийн жилийн 2 улирлаас хэтрэхгүй байна.

9.3. Монгол хэлний бэлтгэлийн сургалтын хөтөлбөрийг холбогдох мэргэжлийн тэнхим боловсруулан, тэнхимийн хөтөлбөрийн дэд хороогоор хэлэлцүүлж, хөтөлбөр хариуцсан нэгжээр баталгаажуулна.

9.4. Гадаадын иргэн Монгол хэлний бэлтгэл хөтөлбөрт элсэх хүсэлтийг намрын улиралд суралцах бол 5 дугаар сарын 01-нээс 7 дугаар сарын 20-ны хооронд, хаврын

улиралд суралцах бол 10 дугаар сарын 01-нээс 12 дугаар сарын 20-ны хооронд тус тус багтаан ирүүлнэ.

9.5. Элсэн суралцах хүсэлт гаргаж буй гадаадын иргэн дээр дурьдсан хугацаанд багтаан дараах бичиг баримтуудыг бүрдүүлэн цахимаар бүртгүүлнэ. Үүнд:

9.5.1. Элсэх хүсэлт гаргах маягт (загварын дагуу);

9.5.2. Гадаад паспорт (хүчинтэй хугацаа 6 сараас дээш байх);

9.5.3. Монгол улсад суралцах хугацааны сургалтын төлбөр, амьдрах зардлыг хариуцах байгууллага, хувь хүнээс гаргасан санхүүгийн баталгаа (тэтгэлэг, банкны тодорхойлолт болон түүнтэй дүйцэх баталгаа);

9.5.4. Тухайн иргэний мэдлэг боловсрол, ажлын туршлага, суралцах арга барилыг нь тодорхойлсон удирдах ажилтны болон профессор багшийн тодорхойлолт (загварын дагуу);

9.5.5. Эрүүл мэндийн хуудас (загварын дагуу, сүүлийн 3 сарын дотор эмнэлгээс олгосон байх);

9.5.6. Цээж зураг (сүүлийн 6 сард авхуулсан, 3x4 хэмжээтэй байх).

9.6. ЭБХ нь суралцах хүсэлт гаргасан гадаадын иргэний бичиг баримтыг хүсэлт гаргах хугацаа дууссанаас хойш долоо хоногийн дотор хянаж, шаардлага хангасан гадаад иргэний нэрсийг баталгаажуулан ОТХ-т ирүүлнэ.

9.7. ОТХ нь шаардлага хангасан гадаадын иргэнд ГИХГ-аас олгосон виз мэдүүлэхийг зөвшөөрсөн албан бичиг, МУИС-д суралцах зөвшөөрлийн бичиг болон холбогдох мэдээллийг цахим шуудан болон баталгаат шуудангаар илгээнэ. Илгээх мэдээлэлд Монгол улсад оршин суух виз хэрхэн авах тухай зөвлөмж, сургалтын төлбөр, хураамж, дотуур байр, амьдрах орчин, нөхцөлийн талаарх мэдээлэл, монгол хэлний түвшин тогтоо шалгалт авах өдөр, цаг, газар зэргийг заавал дурдсан байна.

9.8. Гадаадын иргэнийг хүлээн авах, бүртгэх, байрлуулах асуудлыг энэ журмын 6-р зүйлд заасны дагуу зохион байгуулна.

9.9. Монгол улсад оршин суугаа гадаадын иргэний хувьд виз, дотуур байрны үйлчилгээнд хамрагдахгүй болно.

9.10. Монгол хэлний хөтөлбөрт суралцах гадаадын иргэний монгол хэлний түвшин тогтоо шалгалтыг Монгол улсад ирсний дараа мэргэжлийн тэнхимээс зохион байгуулж, суралцах түвшинг тогтоо бөгөөд сургалтын үйл ажиллагаа нь боловсролын зэрэг олгох сургалттай ижил дүрэм, журмаар явагдана.

9.11. Хөтөлбөрт суралцаж буй гадаадын иргэний оршин суух бүртгэл, зөвлөн чиглүүлэх, даатгалд хамруулах, суралцах хугацааны дэмжлэг үйлчилгээ, нийгэм, соёлын хөтөлбөрт хамруулах зэрэг асуудлыг ОТХ хариуцан зохион байгуулна.

9.12. Монгол хэлний бэлтгэл хөтөлбөрт суралцагчийн судлах хичээлийн багц цагийн төлбөрийг МУИС-ийн Удирдах зөвлөл батлах ба сургалтын төлбөрийг суралцагч улирал бүр төлнө.

9.13. Монгол хэлний бэлтгэл хөтөлбөрт суралцагч нь хичээлийн жилийн эцэст МХТТШ өгөх ба амжилттай төгссөн суралцагч боловсролын зэрэг олгох сургалтанд элсэн суралцах эрхтэй болно. Гадаадын иргэний монгол хэлний түвшингээс шалтгаалан МХТТШ-ийг улирлын эцэст зохион байгуулж болно.

9.14. Боловсролын зэрэг олгох хөтөлбөрт тэнцэх монгол хэлний түвшин, шаардлага, үнэлгээг холбогдох мэргэжлийн тэнхим боловсруулж хөтөлбөрт тусгаж баталгаажуулна.

9.15. Монгол хэлний бэлтгэл хөтөлбөр төгссөн гадаадын иргэнд МУИС-ийн Захирлын тушаалаар гэрчилгээ олгоно. Гэрчилгээ нь тухайн гадаад иргэний монгол хэлний мэдлэгийн түвшинг илэрхийлэх үндсэн баримт бичиг болно.

111744746
УХД0072 9104399

АРАВ. ОЮУТАН СОЛИЛЦОО, ИНТЕРНШИП ХӨТӨЛЬӨР

10.1. Оюутан солилцоо, интерншип хөтөлбөр нь МУИС-ийн гадаадын бусад их, дээд сургуультай байгуулсан хамтын ажиллагааны гэрээний дагуу хэрэгжинэ. Оюутан солилцооны гэрээ нь МУИС-ийн эсвэл бүрэлдэхүүн сургуулийн түвшинд хийгдсэн байна.

10.2. OTX нь оюутан солилцооны гэрээний бүртгэл, хэрэгжилт, тайлан мэдээг хариуцна. OTX нь тухайн хичээлийн жилд хэрэгжүүлэх оюутан солилцоо, интерншип хөтөлбөрийн саналыг бүрэлдэхүүн сургуулиас авч нэгтгэн, зар мэдээллийг бэлтгэж, гэрээтэй сургуулиудад хүргүүлнэ.

10.3. Оюутан солилцооны хөтөлбөрийг жилд хоёр удаа зохион байгуулах ба гадаадын иргэн хаврын улиралд суралцах бол 10 дугаар сарын 01-нээс 12 дугаар сарын 20-ны хооронд, намрын улиралд суралцах бол 5 дугаар сарын 01-нээс 7 дугаар сарын 20-ны хооронд суралцах хүсэлтээ бүртгэлийн системд цахим хэлбэрээр гаргана.

10.4. ЭБХ нь хөтөлбөрт хамрагдах хүсэлт гаргасан гадаадын иргэний холбогдох бичиг баримтыг хүсэлт гаргах хугацаа дууссанаас хойш долоо хоногийн дотор хянаж, холбогдох бүрэлдэхүүн сургууль, тэнхимд хүргүүлэх ба нэгж нь хөтөлбөрт хамруулах тухай шийдвэрийг OTX-д ирүүлнэ. OTX нь шаардлага хангасан гадаадын иргэний оршин суух зөвшөөрөл, визний үйлчилгээг хариуцна.

10.5. Боловсролын зэрэг олгох болон Монгол хэлний бэлтгэл хөтөлбөр сургалтанд хамрагдах дээрх хөтөлбөрийн суралцагчдыг сургалтын мэдээллийн системд бүртгэх ба хүлээн авах, оюутны байранд байрлуулах асуудлыг энэ журмын 6-р зүйлд заасны дагуу зохион байгуулна.

10.6. Хамтын ажиллагааны гэрээний нөхцөлөөс шалтгаалан зэргийн бус сургалтын хэлбэрээр оюутан солилцоо, интерншип хөтөлбөрийг хэрэгжүүлж болох бөгөөд энэ тохиолдолд хөтөлбөрийн агуулга, сургалтын хэлбэр, хугацаа, үйл ажиллагааг харгалзах бүрэлдэхүүн сургууль шийдвэрлэнэ.

10.7. Хөтөлбөрт суралцагчийн дотуур байр, сургалтын төлбөрийн хөнгөлөлт, тэтгэлэг олгох асуудлыг хамтын ажиллагааны гэрээний дагуу шийдвэрлэнэ.

10.8. Хөтөлбөрт суралцаж төгссөн гадаадын суралцагчид дүнгийн тодорхойлолт, гэрчилгээ олгоно.

10.9. Хамтын ажиллагаатай гадаадын их, дээд сургуулийн оюутан солилцооны хөтөлбөрт хамрагдах МУИС-ийн суралцагчийг МУИС-ийн захирлын тушаалаар байгуулагдсан ажлын хэсэг сонгон шалгаруулна. Уг хөтөлбөрт хамрагдах суралцагчтай OTX, ЭБХ хоорондын гурвалсан гэрээ байгуулна.

10.10. Гэрээнд хөтөлбөрт хамрагдах суралцагчийн суралцах хугацаа, сургалтын төлөвлөгөө, багц цаг, дүн дүйцүүлэлт, төлбөр, үүрэг, хариуцлагыг тодорхой заана. Гэрээт сургуулиас OTX-т ирүүлсэн тухайн суралцагчийн суралцсан хугацааны

дүнгийн албан тодорхойлолтыг үндэслэн ЭБХ нь тухайн суралцагчийн багц цаг дүйцүүлэлтийг хийж, үргэлжлүүлэн суралцах нөхцөлөөр хангана.

АРВАН НЭГ. ЗУНЫ СУРГАЛТ ХӨТӨЛЬБӨР

11.1. Зуны сургалт хөтөлбөрийг бүрэлдэхүүн сургууль, тэнхим, хүрээлэн хариуцаж хэрэгжүүлнэ. Хөтөлбөрийн мэдээлэл түгээх, сурталчлах, гадаадын иргэнийг бүртгэх, утгах, байрлуулах, танхимиин ~~сургалтанд~~ ^{УХЛ0072 9104399} хамруулах зэрэг хөтөлбөрийн хэрэгжилтэнд ОТХ дэмжлэг үзүүлж ажиллана.

11.2. Зуны сургалт нь батлагдсан хөтөлбөрөөр хэрэгжих ба сургалтын агуулга, хамрах хүрээ, чиглэл, хугацаа, үр дүн зэргийг тусгасан хөтөлбөрийг холбогдох бүрэлдэхүүн сургуулийн захиргааны зөвлөлийн хурлаар хэлэлцэж батална.

11.3. Хөтөлбөр хэрэгжүүлэгч нэгж нь жил бүрийн 6 дугаар сарын 01-ний дотор хөтөлбөрт хамрагдах хүсэлтэй гадаадын иргэний мэдээллийг ОТХ-д ирүүлэх ба шаардлага хангасан гадаадын иргэнд визний зөвшөөрөл авах үйлчилгээг ОТХ хариуцна.

11.4. Хөтөлбөр хэрэгжүүлэгч нэгж нь хөтөлбөрт оролцогч гадаадын иргэнийг Монголд ирэх үед сургалтын хөтөлбөрийн агуулга, хугацаа, оролцогчдын хариуцлага, чухал шаардлагатай үед тусlamж авах боломж зэрэг мэдээллийг албан танилцуулах ба хөтөлбөрт хамрагдах гадаадын иргэн нь амь насны болон гэнэтийн ослын даатгал хийлгэсэн байна.

11.5. Хөтөлбөрт хамрагдах гадаадын иргэнийг зуны улиралд оюутны байранд байрлуулах боломжтой ба хөтөлбөр хэрэгжүүлэгч нэгж байранд байрлуулах хүсэлтийг жил бүрийн 6 дугаар сарын 15-ны дотор ОТХ-д ирүүлнэ.

11.6. Уг хөтөлбөрт суралцаж төгссөн гадаадын иргэнд гэрчилгээ олгоно.

11.7. Зуны сургалтын болон оюутны байранд байрлах төлбөрийг жил бүр МУИС-ийн Удирдах зөвлөлөөр хэлэлцэж батална.

11.8. Хөтөлбөр хэрэгжүүлэгч нэгж нь зуны сургалт дууссанаас хойш 14 хоногийн дотор хөтөлбөрийн хэрэгжилт, тайланг ОТХ-д ирүүлнэ.

11.9. ОТХ нь МУИС-ийн зуны сургалтын хөтөлбөрүүдийн мэдээлэл, хэрэгжилт, тайланг нэгтгэх үүрэгтэй ажиллана.

АРВАН ХОЁР. БУСАД

12.1. МУИС-д суралцаж буй гадаадын иргэн нь суралцах явцдаа шашин, тероризм, улс төрийн үйл ажиллагаанд оролцохгүй бөгөөд Монгол улсын хууль тогтоомж, МУИС-ийн дүрэм, журмыг дагаж мөрдөн, Монгол улсын түүх соёл, ёс заншилд хүндэтгэлтэй хандана.

12.2. МУИС-д өмнө нь суралцах явцдаа Монгол улсын хууль тогтоомж, сургуулийн дотоод дүрэм, журмыг зөрчиж сургуулиас хасагдсан гадаадын иргэн дахин суралцах боломжгүй.

12.3. ОТХ нь МУИС-д суралцаж буй гадаадын иргэдийн талаарх судалгааг жил бүр гаргаж боловсролын асуудал эрхэлсэн төрийн захиргааны төв байгууллагад хүргүүлнэ.

12.4. МУИС-д гадаадын иргэнийг суралцуулах журмыг түгээмэл хэрэглэгддэг албан ёсны гадаад хэл (англи) дээр орчуулан, үйл ажиллагаанд хэрэглэнэ.